

MALAYSIA
DEWAN RAKYAT
ATURAN URUSAN MESYUARAT

NASKAH SAHIH/BAHASA MALAYSIA

<http://www.parlimen.gov.my>

HARI SELASA, 26 MAC 2019, PUKUL 10.00 PAGI

Bil. 5

WAKTU PERTANYAAN-PERTANYAAN MENTERI

1. PR-1421-MQT0360
Dr. Kelvin Yii Lee Wuen [Bandar Kuching] minta **MENTERI KERJA RAYA** menyatakan status pelan Kerajaan untuk menukar "*Project Delivery Partner*" (*PDP*) kepada "*turnkey contractor*" untuk Pan Borneo Highway dan juga apakah kelebihan yang akan ada dengan penukaran tersebut.

2. PR-1421-MQT0354
Tuan Mohd Shahar bin Abdullah [Paya Besar] minta **MENTERI INDUSTRI UTAMA** menyatakan apakah usaha Kementerian untuk memperkasa industri sawit Malaysia terutama daripada segi mencari pasaran baharu dan meluaskan industri hiliran dalam usaha membantu meningkatkan pendapatan para pekebun kecil sawit.

3. PR-1421-MQT0364
Datuk Dr. Hasan bin Bahrom [Tampin] minta **MENTERI KESIHATAN** menyatakan adakah pihak Kementerian merancang untuk menggunakan kaedah rekod maklumat pesakit secara digital atau elektronik seperti di negara jiran kita iaitu Singapura dan Thailand, bagi memudahkan rakyat untuk menerima perkhidmatan kesihatan di mana-mana fasiliti kesihatan dalam negara berbanding kaedah manual dengan menggunakan kad atau kertas sepertimana yang diamalkan kini. Dan bilakah Malaysia dijangka akan setanding dengan negara-negara maju yang lain dalam sudut ini.

MALAYSIA
DEWAN RAKYAT
ATURAN URUSAN MESYUARAT

NASKAH SAHIH/BAHASA MALAYSIA

<http://www.parlimen.gov.my>

HARI SELASA, 26 MAC 2019, PUKUL 10.00 PAGI

Bil. 10

WAKTU PERTANYAAN-PERTANYAAN MENTERI

PERTANYAAN-PERTANYAAN BAGI JAWAB LISAN

1. PR-1421-L03479
Puan Nurul Izzah binti Anwar [Permatang Pauh] minta **MENTERI KESIHATAN** menyatakan :-
 - (a) data dan statistik kadar penghidap penyakit diabetes dan obesiti; dan
 - (b) jangkaan impak cukai minuman bergula yang ingin dikuatkuasakan kepada sektor ekonomi dan kesihatan negara.

2. PR-1421-L03976
Dato' Haji Che Abdullah bin Mat Nawi [Tumpat] minta **MENTERI PERTANIAN DAN INDUSTRI ASAS TANI** menyatakan nilai hasil tangkapan laut dalam mengikut negeri dari 2015-2018.

3. PR-1421-L03636
Datuk Rozman bin Isli [Labuan] minta **MENTERI AIR, TANAH DAN SUMBER ASLI** menyatakan sampai tahun bilakah kapasiti bekalan air dari Sabah ke Labuan yang ada sekarang mencukupi dan apakah perancangan masa depan.

4. PR-1421-L03342
Datuk Seri Panglima Dr. Maximus Johnity Ongkili [Kota Marudu] minta **MENTERI PEMBANGUNAN LUAR BANDAR** menyatakan apakah pendekatan dan program-program baru Kementerian untuk membasmi kemiskinan dan meningkatkan pendapatan rakyat di luar bandar demi mencapai matlamat negara maju menjelang tahun 2020. Adakah program-program yang telah terbukti berkesan seperti Projek Jalan Kampung/Desa, BELB, BALB, PPRT, PIA, PIAS, dll akan diteruskan dan apakah sasaran pencapaian yang ditetapkan, khas untuk Sabah.

5. PR-1421-L03125
Dato' Sri Dr. Santhara [Segamat] minta **MENTERI BELIA DAN SUKAN** menyatakan adakah Kementerian mempunyai sebarang rancangan untuk melahirkan pemain-pemain catur yang bertaraf Grand Master sebelum tahun 2022.

6. PR-1421-L03731
Dato' Sri Azalina Othman Said [Pengerang] minta **PERDANA MENTERI** menyatakan bilakah Kerajaan akan meminda Perlembagaan Persekutuan, Kanun Tatacara Jenayah dan Akta Tafsiran 1948/1967 bagi memisahkan kuasa Pendakwa Raya dan kuasa Peguam Negara bagi memastikan Pendakwa Raya bebas dan berkecuali sekaligus mengelakkan persepsi negatif mahupun sebarang campur tangan pihak Kerajaan dalam pendakwaan.

7. PR-1421-L03393
Datuk Zakaria bin Mohd. Edris @ Tubau [Libaran] minta **MENTERI DALAM NEGERI** menyatakan langkah dan tindakan diambil untuk menambah baik kemudahan balai-balai polis serta kemudahan lojistik untuk anggota polis di kawasan pulau-pulau perairan pantai timur Sabah untuk mengharungi cabaran tugas yang kritikal berikutan ancaman jenayah rentas sempadan.

8. PR-1421-L03334
Dato' Sri Bung Moktar bin Radin [Kinabatangan] minta **MENTERI PENDIDIKAN** menyatakan bilakah Kementerian berhasrat untuk melawat sendiri sekolah-sekolah daif di negeri Sabah dan kawasan Parlimen Kinabatangan khususnya agar dapat melihat sendiri keadaan sekolah-sekolah daif ini dan seterusnya merancang untuk menaik taraf bangunan-bangunan sekolah tersebut.

9. PR-1421-L03603
Tuan Ahmad Fahmi bin Mohamed Fadzil [Lembah Pantai] minta **MENTERI HAL EHWAL EKONOMI** menyatakan kedudukan kewangan terkini FELDA, FGV serta semua anak-anak syarikat berkaitan serta langkah-langkah yang telah dan akan diambil untuk memulihkan institusi ini.
10. PR-1421-L03945
Tuan Nik Mohamad Abduh bin Nik Abdul Aziz [Bachok] minta **MENTERI BELIA DAN SUKAN** menyatakan konsep yang akan diperkenalkan dalam program Sekolah Pemimpin Masa Hadapan dan apakah yang membezakan program ini dengan PLKN yang dianggap merugikan.
11. PR-1421-L03837
Puan Kasthuriraani A/P Patto [Batu Kawan] minta **MENTERI SUMBER MANUSIA** menyatakan apakah faktor-faktor penyumbang kepada peningkatan kadar pengangguran graduan dan belia dan apakah langkah-langkah yang akan diambil oleh pihak Kerajaan bagi mengatasi masalah pengangguran di negara terutama sekali antara belia dan OKU.
12. PR-1421-L03745
Tuan Haji Awang bin Hashim [Pendang] minta **PERDANA MENTERI** menyatakan :-
- (a) adakah aset anak syarikat Tabung Haji telah dicairkan (*sold*) melalui SPV yang tubuhkan oleh Kementerian Kewangan; dan
 - (b) sekiranya ada, beri penjelasan aset yang mana dan berapakah perolehannya.
13. PR-1421-L04165
Tuan Kesavan A/L Subramaniam [Sungai Siput] minta **MENTERI PENDIDIKAN** menyatakan bagaimanakah Kementerian akan mempromosikan Pendidikan Teknikal dan Latihan Vokasional (TVET) untuk menarik lebih ramai pelajar, dengan menghapuskan persepsi ibu bapa dan bakal pelajar kononnya pendidikan ini adalah "bertahap rendah" dan "untuk mereka yang gagal dalam pembelajaran".
14. PR-1421-L03210
Dato' Sri Dr. Haji Ismail bin Haji Abd. Muttalib [Maran] minta **MENTERI KESIHATAN** menyatakan apakah status dan perancangan Kementerian dalam menyiapkan pembinaan Hospital Maran yang telah diluluskan dalam RMK-11 bagi memberi kemudahan dan keselesaan masyarakat di daerah Maran khususnya.

15. PR-1421-L03407
Tuan Willie anak Mongin [Puncak Borneo] minta **MENTERI PEMBANGUNAN LUAR BANDAR** menyatakan status permohonan dan pelaksanaan Projek Jalan Desa menghubungi Kpg Biya Jabber yang telah dipohon oleh Pejabat Parlimen Puncak Borneo melalui JKR Sarawak dan Salinan kepada Kementerian Pembangunan Luar Bandar (KPLB).
16. PR-1421-L03255
Tuan Ramli bin Dato' Mohd Nor [Cameron Highlands] minta **PERDANA MENTERI** menyatakan usaha Kerajaan untuk meningkatkan serta mengukuhkan lagi perpaduan dalam kalangan masyarakat yang berbilang kaum di Malaysia.
17. PR-1421-L03451
Datuk Wong Tien Fatt @ Wong Nyuk Foh [Sandakan] minta **MENTERI KOMUNIKASI DAN MULTIMEDIA** menyatakan apakah perancangan Kementerian untuk menaiktaraf kemudahan-kemudahan *broadband* dan internet di seluruh Sabah memandangkan banyak kawasan perumahan di bandar masih tidak dilengkapi perkhidmatan *'fibre optic'*.
18. PR-1421-L03503
Dato' Sri Haji Fadillah bin Yusof [Petrajaya] minta **MENTERI PENDIDIKAN** menyatakan langkah-langkah yang telah dan akan diambil oleh pihak Kementerian bagi memastikan bekalan diesel ke sekolah-sekolah di pedalaman mencukupi dan apakah penyelesaian jangka masa panjang bagi mengatasi masalah tersebut.
19. PR-1421-L03359
Puan Rusnah binti Aluai [Tangga Batu] minta **MENTERI PEMBANGUNAN LUAR BANDAR** menyatakan perancangan Kementerian bagi menaik taraf ekonomi kampung-kampung yang tidak terpilih bagi Program Kampung Desa Lestari.
20. PR-1421-L03523
Tuan Khairy Jamaluddin [Rembau] minta **PERDANA MENTERI** menyatakan berapakah jumlah peruntukan serta geran yang telah dan akan disalurkan pihak Kementerian bagi penyelidikan dan pembangunan (R&D) serta tujuan-tujuan lain berkaitan projek kereta nasional ketiga.
21. PR-1421-L04296
Tuan Chan Ming Kai [Alor Setar] minta **MENTERI DALAM NEGERI** menyatakan siapa anggota yang terlibat dalam Jawatankuasa Panel Kewarganegaraan dan berapa kes permohonan diproses setiap bulan serta kriteria-kriteria yang layak disyorkan sokong oleh panel.

22. PR-1421-L04196
Dato' Syed Abu Hussin bin Hafiz Syed Abdul Fasal [Bukit Gantang] minta **MENTERI PENGANGKUTAN** menyatakan apakah jaminan Kerajaan bahawa industri Teksi Tradisional tidak akan terjejas dengan kutipan hasil pendapatan akibat wujudnya sistem e-hailing yang tidak mengikut peraturan dan langkah-langkah penguatkuasaan sistem e-hailing kepada Industri Teksi Tradisional dan Grab yang dijadualkan bermula pada 12 Julai 2019 ini. Apakah bentuk tindakan yang akan dikenakan kepada mereka yang gagal mendaftar untuk mendapatkan lesen Kenderaan Perkhidmatan Awam (PSV) dan lain-lain syarat yang telah ditetapkan dan digariskan oleh pihak berkuasa.
23. PR-1421-L03431
Tuan Sanisvara Nethaji Rayer A/L Rajaji [Jelutong] minta **MENTERI AIR, TANAH DAN SUMBER ASLI** menyatakan bilakah projek-projek tebatan banjir di Sungai Pinang dan Sungai Jelutong di Jelutong Pulau Pinang dijangka disiapkan.
24. PR-1421-L03666
Tuan Lukanisman bin Awang Sauni [Sibuti] minta **MENTERI PEMBANGUNAN WANITA, KELUARGA DAN MASYARAKAT** menyatakan adakah pihak Kerajaan telah mendapatkan input sepenuhnya daripada masyarakat berbilang kaum, kumpulan agamawan serta masyarakat Orang Asal di Sabah dan Sarawak mengenai isu perkahwinan bawah umur 18 tahun.
25. PR-1421-L04075
Dr. Kelvin Yii Lee Wuen [Bandar Kuching] minta **MENTERI KESIHATAN** menyatakan sebab-sebab kenaikan harga beberapa ubat yang banyak digunakan di hospital-hospital dan KK termasuk Paracetamol dan Hydrochlorothiazide. Adakah revisi harga terkini tersebut termasuk dalam kontrak bersama Pharmaniaga atau syarikat pengeluar yang berkaitan.
26. PR-1421-L04208
Dato' Sri Haji Tajuddin bin Abdul Rahman [Pasir Salak] minta **MENTERI HAL EHWAL EKONOMI** menyatakan mengapa pertumbuhan ekonomi negara pada tahun ini dijangka hanya 4.5 %.

27. PR-1421-L03074
Tuan Larry Soon @ Larry Sng Wei Shien [Julau] minta **MENTERI PENDIDIKAN** menyatakan jumlah peruntukan yang diberikan oleh Kementerian untuk menyambung sekolah-sekolah luar bandar di Sarawak kepada grid bekalan elektrik. Jelaskan juga jumlah sekolah yang terlibat dan lokasi sekolah-sekolah tersebut.
28. PR-1421-L03252
Tuan Yusuf bin Abd. Wahab [Tanjung Manis] minta **MENTERI KESIHATAN** menyatakan untuk membina atau menambah pusat dialisis di kawasan Tanjung Manis atau Pulau Bruit memandangkan hospital yang ada di Daro, Sarikei dan Sibu adalah terlalu jauh untuk pesakit buah pinggang untuk mendapatkan rawatan tersebut.
29. PR-1421-L03594
Dato' Seri Haji Mukhriz bin Tun Dr. Mahathir [Jerlun] minta **MENTERI PELANCONGAN, SENI DAN BUDAYA** menyatakan kesan pelancongan sukan atas industri pelancongan negara. Pohon dinyatakan:-
- (a) jumlah pelancongan sukan yang dijalankan di negara ini tahun lalu dan apakah perancangan aktiviti pelancongan sukan pada tahun ini; dan
 - (b) promosi untuk menggalakkan pelancongan sukan terutamanya melibatkan acara '*non-conventional sport*' seperti acara sukan lasak .
30. PR-1421-L04104
Tuan Ahmad Tarmizi bin Sulaiman [Sik] minta **MENTERI KERJA RAYA** menyatakan menjelaskan langkah dan usaha untuk mengurangkan kemalangan di Lebuhraya Utara Selatan (PLUS) dan langkah mengurangkan kesesakan lalulintas ketika berlaku kemalangan dan ketika musim perayaan.
31. PR-1421-L03576
Puan Maria Chin binti Abdullah [Petaling Jaya] minta **MENTERI PEMBANGUNAN WANITA, KELUARGA DAN MASYARAKAT** menyatakan sama ada modul "*consent*" akan diperkenalkan dalam kursus kahwin di seluruh negara dan langkah Kementerian untuk menggalakkan wanita untuk melaporkan kejadian rogol dalam perkahwinan.

32. PR-1421-L02893
Tan Sri Noh bin Haji Omar [Tanjung Karang] minta **MENTERI KERJA RAYA** menyatakan perkembangan terkini Projek Lebuh Raya Persisiran Pantai Barat terutamanya di Kawasan Tanjung Karang dan berapakah kadar tol yang akan dikenakan kepada pengguna apabila siap kelak.
33. PR-1421-L04173
Puan Alice Lau Kiong Yieng [Lanang] minta **MENTERI PERDAGANGAN DALAM NEGERI DAN HAL EHWAL PENGGUNA** menyatakan langkah-langkah susulan untuk mengawal harga barangan setelah GST dimansuhkan dan SST dilaksanakan memandangkan banyak aduan menyatakan harga barang naik selepas pelaksanaan SST.
34. PR-1421-L03379
Puan Rubiah binti Haji Wang [Kota Samarahan] minta **MENTERI KEWANGAN** menyatakan sejauh mana usaha pihak kerajaan dalam memudahkan proses pengemaskinian maklumat permohonan penerima Bantuan Sara Hidup (BSH) di kawasan luar bandar dan pedalaman.
35. PR-1421-L03651
Tuan Sivakumar Varatharaju Naidu [Batu Gajah] minta **PERDANA MENTERI** menyatakan secara terperinci tentang peruntukan kerajaan sejumlah RM100 juta untuk pembangunan kaum India. Berapakah jumlah wang tersebut yang telah digunakan oleh MITRA dan apakah pecahan bagi penggunaan peruntukan tersebut sehingga 1 Mac 2019.
36. PR-1421-L03289
Dato' Sri Hajah Nancy Shukri [Batang Sadong] minta **MENTERI PELANCONGAN, SENI DAN BUDAYA** menyatakan langkah yang diambil untuk mempromosi industri pelancongan negara terutamanya Sarawak di luar negara.
37. PR-1421-L04270
Tuan Steven Choong Shiau Yoon [Tebrau] minta **MENTERI PENDIDIKAN** menyatakan senarai statistik sekolah-sekolah yang dalam keadaan daif di seluruh Semenanjung Malaysia mengikut negeri dan adakah peruntukan khas telah disediakan bagi membaik pulih segala kerosakan yang telah dikenal pasti.
38. PR-1421-L03100
Datuk Haji Ahmad Jazlan bin Yaakub [Machang] minta **MENTERI HAL EHWAL EKONOMI** menyatakan berapakah kadar miskin tegar di negeri Kelantan dan apakah perancangan terperinci pihak Kementerian dalam mengatasi masalah ini.

39. PR-1421-L02969

Dato' Ngeh Koo Ham [Beruas] minta **MENTERI AIR, TANAH DAN SUMBER ASLI** menyatakan kenapa Indah Water Konsortium masih mengeluarkan surat tuntutan kepada pemilik-pemilik premis sungguhpun bayaran yang dituntut itu telah melebihi 6 tahun dan tidak boleh dituntut lagi (*time barred*).

40. PR-1421-L04092

Datuk Dr. Jeffrey Gapari Kitingan [Keningau] minta **MENTERI HAL EHWAL EKONOMI** menyatakan :-

- (a) memandangkan kemiskinan dan jurang kemiskinan yang meruncing di Sabah dan Sarawak, adakah Kerajaan melalui Kementerian Hal Ehwal Ekonomi, Kementerian Pembangunan Luar Bandar serta Kementerian Pertanian Dan Industri Asas Tani akan merancang apa-apa program khas untuk Sabah dan Sarawak untuk membasmi kemiskinan tersebut dan mengurangkan jurang perbezaan dengan kadar segera memandangkan Sabah dan Sarawak sudah berada dalam Malaysia selama 56 tahun dan masih miskin papa kedana dan serba berkurangan dari segala aspek termasuk kemudahan asas; dan
- (b) adakah Kerajaan bercadang membuat satu siasatan dan banci berkecuali untuk menentukan tahap kemiskinan yang sebenarnya khususnya di Sabah dan Sarawak.

41. PR-1421-L02996

Dato' Abdullah Sani bin Abdul Hamid [Kapar] minta **MENTERI SUMBER MANUSIA** menyatakan pelan pindaan Akta Kesatuan.

42. PR-1421-L03547

Dato' Sri Dr. Haji Ismail bin Mohamed Said [Kuala Krau] minta **MENTERI HAL EHWAL EKONOMI** menyatakan bilakah Kerajaan Pakatan Harapan akan menunaikan janji bagi menghapuskan hutang peneroka FELDA dan adakah sebarang inisiatif bagi membantu golongan peneroka dalam mendepani cabaran kos sara hidup yang semakin meningkat.

43. PR-1421-L04014

Tuan Wong Chen [Subang] minta **MENTERI KEWANGAN** menyatakan senarai 30 syarikat-syarikat teratas dan senarai 30 individu teratas yang bakal menerima bayaran balik RM18 bilion cukai pendapatan yang telah diperuntukkan dalam Bajet 2019.

44. PR-1421-L03417
Dato' Sri Mustapa bin Mohamed [Jeli] minta **MENTERI PERDAGANGAN ANTARABANGSA DAN INDUSTRI** menyatakan status terkini pelaburan PETRONAS dan Saudi Aramco di Pengerang. Bilakah projek ini akan mula beroperasi sepenuhnya dan apakah kesannya kepada ekonomi termasuklah peluang pekerjaan, peluang perniagaan kepada syarikat PKS dan eksport.
45. PR-1421-L03005
Datuk Seri Dr. Ronald Kiandee [Beluran] minta **MENTERI KEWANGAN** menyatakan :-
- (a) apakah tahap kemampuan Kerajaan dalam melaksanakan Bajet 2019; dan
 - (b) adakah Kerajaan akan membentangkan semula penyesuaian bajet berdasarkan kepada kedudukan ekonomi dan harga pasaran minyak dunia semasa.
46. PR-1421-L03371
Puan June Leow Hsiad Hui [Hulu Selangor] minta **MENTERI KOMUNIKASI DAN MULTIMEDIA** menyatakan sama ada Kementerian atau Suruhanjaya Komunikasi dan Multimedia (SKMM) akan menggalakkan pembinaan lebih banyak menara telekomunikasi di kawasan luar bandar, terutamanya di kawasan Orang Asli.
47. PR-1421-L03679
Dato' Seri Dr. Shahidan bin Kassim [Arau] minta **PERDANA MENTERI** menyatakan apakah pihak Kerajaan akan menyediakan tapak (melalui pengambilan tanah) bagi projek sosial seperti tapak surau, tapak dewan, tapak tadika dan lain-lain lagi tanpa mengganggu kawasan lapang. Apakah pihak Kerajaan bercadang untuk membenarkan Wakaf Bertempoh (20 tahun atau 30 tahun) bagi tapak kepunyaan individu.
48. PR-1421-L03614
Tuan William Leong Jee Keen [Selayang] minta **MENTERI LUAR NEGERI** menyatakan bagaimana dengan hubungan luar Malaysia dengan Singapura pada masa ini susulan isu pertikaian ruang udara dan sempadan perairan dengan Singapura serta komitmen Kerajaan bagi merapatkan lagi hubungan baik dengan Singapura.

49. PR-1421-L03116
Dato' Rosol bin Wahid [Hulu Terengganu] minta **MENTERI TENAGA, SAINS, TEKNOLOGI, ALAM SEKITAR DAN PERUBAHAN IKLIM** menyatakan langkah-langkah yang diperkenalkan Kementerian dalam menggalakkan penglibatan sektor swasta menceburi Industri Tenaga Boleh Diperbaharui terutamanya tenaga solar khususnya di negeri Terengganu.
50. PR-1421-L03711
Tuan Haji Wan Hassan bin Mohd Ramli [Dungun] minta **MENTERI PENGANGKUTAN** menyatakan lokasi – lokasi pemasangan AES tambahan dan perbandingan data kes kemalangan di lokasi – lokasi kemalangan setelah AES beroperasi.
51. PR-1421-L03806
Dato' Johari bin Abdul [Sungai Petani] minta **PERDANA MENTERI** menyatakan bilakah Kerajaan akan memulakan proses perlantikan Ahli-ahli Suruhanjaya seperti Suruhanjaya Hak Asasi Manusia (SUHAKAM), Suruhanjaya Pilihan Raya (SPR), Suruhanjaya Pencegahan Rasuah Malaysia (SPRM) dan Suruhanjaya Pelantikan Kehakimam Malaysia akan dikemukakan dan disahkan oleh Parlimen.
52. PR-1421-L03420
Datuk Seri M. Saravanan [Tapah] minta **MENTERI PERTANIAN DAN INDUSTRI ASAS TANI** menyatakan apakah keputusan yang Kerajaan Pakatan Harapan boleh maklumkan hasil daripada Kajian Separuh Penggal Dasar Agro Makanan Negara dan adakah telah mewujudkan satu dasar yang lebih baik dengan cara memanfaatkan teknologi pertanian moden yang terkini.
53. PR-1421-L04245
Tuan Khoo Poay Tiong [Kota Melaka] minta **MENTERI KESIHATAN** menyatakan status pelaksanaan Skim Perlindungan Nasional B40 (mySalam) dan Skim Perlindungan Kesihatan (Peka), dan apakah strategi jangka masa panjang Kementerian untuk skim-skim ini.
54. PR-1421-L03590
Tuan Charles Anthony Santiago [Klang] minta **MENTERI KESIHATAN** menyatakan cadangan dan rancangan kerajaan untuk memperkenalkan '*plain-packaging*' bagi rokok dan menyatakan '*road map*' untuk menyedarkan rakyat Malaysia mengenai kepentingan dasar ini untuk mencegah kanser.

55. PR-1421-L02903
Tuan Wong Hon Wai [Bukit Bendera] minta **MENTERI PELANCONGAN, SENI DAN BUDAYA** menyatakan apakah usaha Kerajaan untuk mengawal selia aktiviti *Airbnb* yang tumbuh seperti cendawan selepas hujan dan sama ada Kementerian berhasrat mengenakan cukai terhadapnya seperti yang dikenakan ke atas hotel-hotel.
56. PR-1421-L03765
Tuan Oscar Ling Chai Yew [Sibü] minta **MENTERI KEWANGAN** menyatakan mengapa fi "*Sufferance Wharf*" telah meningkat kepada RM150. Ini adalah tidak adil kepada kapal yang berlayar dari Sibü ke Limbang dan Lawas, kerana mereka akan memasuki perairan Negara Brunei, di mana ia akan dianggap eksport ke Brunei dan import lagi balik ke Sarawak apabila melintasi perairan Brunei. Kementerian Kewangan harus memberi pengecualian kepada kapal-kapal yang berlayar melintasi perairan Brunei di dalam Sarawak.
57. PR-1421-L03724
Tuan Mohd Shahar bin Abdullah [Paya Besar] minta **MENTERI PERUMAHAN DAN KERAJAAN TEMPATAN** menyatakan perancangan khusus Kementerian untuk mewujudkan skim atau projek perumahan berkelompok khusus untuk anak muda sahaja supaya golongan ini dapat membeli rumah dan dapat memiliki rumah pada harga yang berpatutan dengan situasi, citarasa dan kemampuan kewangan anak muda.
58. PR-1421-L03480
Puan Nurul Izzah binti Anwar [Permatang Pauh] minta **MENTERI PELANCONGAN, SENI DAN BUDAYA** menyatakan :-
- (a) perancangan Kementerian untuk menyelesaikan masalah rangkaian bekalan untuk industri batik negara; dan
 - (b) usaha meluluskan penggunaan kemeja batik Malaysia di Dewan Rakyat pada setiap hari Khamis .
59. PR-1421-L02883
Tuan Hassan bin Abdul Karim [Pasir Gudang] minta **PERDANA MENTERI** menyatakan kenapakah amalan lantikan ahli-ahli politik menjadi ahli-ahli Lembaga pengarah GLC, GLIC dan egensi-egensi Kerajaan seperti YADIM masih lagi diteruskan yang jelas bercanggah dengan janji Manifesto Pilihan Raya PRU-14 Pakatan Harapan.

60. PR-1421-L03720
Dato' Seri Mahdzir bin Khalid [Padang Terap] minta **MENTERI PENDIDIKAN** menyatakan adakah keseluruhan daripada jumlah RM1 bilion atau hanya sebahagian sahaja akan digunakan untuk membaik pulih sekolah daif di Sarawak. Dan berapa banyak sekolah daif yang akan menerima manfaat daripada peruntukan tersebut.
61. PR-1421-L04264
Tuan Su Keong Siong [Kampar] minta **MENTERI PERDAGANGAN DALAM NEGERI DAN HAL EHWAL PENGGUNA** menyatakan inisiatif-inisiatif dan program-program yang telah dijalankan untuk menggalakkan pembelian barangan buatan tempatan untuk merangsang pertumbuhan ekonomi domestik dan juga membantu pengusaha tempatan terutamanya industri kecil dan sederhana.
62. PR-1421-L03052
Datuk Seri Haji Ahmad bin Haji Maslan [Pontian] minta **PERDANA MENTERI** menyatakan mengapa pendaftaran automatik untuk menjadi pengundi belum dilaksanakan lagi, bila akan dilaksanakan dan berapakah jumlah rakyat yang sepatutnya mendaftar tapi belum mendaftar menjadi pengundi mengikut pecahan kaum.
63. PR-1421-L04015
Tuan Wong Chen [Subang] minta **MENTERI PENDIDIKAN** menyatakan :-
- (a) apakah pembiayaan yang Kementerian telah peruntukan bagi tahun 2019 untuk tujuan membaiki sekolah Kerajaan yang usang di Malaysia ; dan
 - (b) sila kemukakan jadual (*plan in action*) bagi proses membaik pulih tersebut.
64. PR-1421-L03174
Dato' Haji Abdul Rahman bin Mohamad [Lipis] minta **MENTERI PENDIDIKAN** menyatakan tindakan kepada segelintir pihak yang cuba memalsukan sijil akademik dan memanipulasikan kelulusan dari IPTA dan IPTS.

65. PR-1421-L02951
Puan Hajah Natrah binti Ismail [Sekijang] minta **MENTERI PENDIDIKAN** menyatakan adakah pihak Kementerian bercadang untuk memartabatkan semula penggunaan tulisan jawi dalam sukatan mata pelajaran Bahasa Melayu seperti mana yang pernah diimplimentasikan penggunaannya secara meluas pada awal tahun 1970 dalam Sistem Pendidikan Negara.
66. PR-1421-L03925
Tuan Ahmad Fadhli bin Shaari [Pasir Mas] minta **MENTERI AIR, TANAH DAN SUMBER ASLI** menyatakan tentang industri bauksit yang telah mencemarkan alam sekitar di Kuantan suatu ketika dahulu dan telah dibuka semula oleh Kerajaan pada tahun ini.
67. PR-1421-L03273
Dato' Mohd. Nizar bin Haji Zakaria [Parit] minta **MENTERI WILAYAH PERSEKUTUAN** menyatakan :-
- (a) adakah Kementerian berhasrat untuk menghasilkan straw alternatif menggunakan bahan-bahan bukan plastik bagi menggantikan penggunaan straw plastik; dan
 - (b) adakah terdapat sebarang kajian yang telah dibuat oleh Kementerian bagi menghasilkan straw alternatif ini.
68. PR-1421-L03305
Dato' Sri Dr. Haji Wan Junaidi bin Tuanku Jaafar [Santubong] minta **MENTERI PENDIDIKAN** menyatakan apakah perubahan dasar, perundangan, peraturan dan pelaksanaan ketara atau rancangan ke arah itu dalam sistem pendidikan Negara yang telah dibuat, sedang dikaji dan bila tarikh-tarikh dijangka boleh siap dilaksanakan.
69. PR-1421-L03515
Datuk Hajah Azizah binti Datuk Seri Panglima Haji Mohd Dun [Beaufort] minta **MENTERI PEMBANGUNAN LUAR BANDAR** menyatakan apakah perancangan terkini untuk tempoh 5 tahun bagi membangunkan dan mempertingkatkan keupayaan dan bilangan wanita luar bandar dalam bidang keusahawanan.

70. PR-1421-L04302

Tuan Lim Kit Siang [Iskandar Puteri] minta **PERDANA MENTERI** menyatakan perkembangan terbaru mengenai kegiatan dan pencapaian Suruhanjaya Bebas Aduan dan Salah Laku Polis (IPCMC) yang menggantikan Suruhanjaya Integriti Agensi Penguatkuasaan (EAIC) dalam segi mempertingkatkan integriti dan keupayaan Polis Diraja Malaysia (PDRM).

ATURAN URUSAN MESYUARAT DAN USUL-USUL

1. **Usul dibuat oleh Tuan Akmal Nasrullah bin Mohd. Nasir [Johor Bahru] dan masalah dicadangkan:-**

"Bahawa suatu ucapan yang tidak sepatunya dipersembahkan kepada Kebawah Duli Yang Maha Mulia Seri Paduka Baginda Yang di-Pertuan Agong, demikian bunyinya:-

"Ampun Tuanku,

Patik, Yang di-Pertua dan Ahli-ahli Dewan Rakyat Malaysia di dalam Persidangan Parlimen, memohon ampun mempersembahkan suatu ucapan yang ikhlas daripada Majlis Dewan Rakyat mengucapkan berbilang-banyak syukur dan menjunjung kasih Titah Kebawah Duli Yang Maha Mulia Seri Paduka Baginda Yang di-Pertuan Agong semasa membuka Penggal Kedua , Parlimen Yang Keempat Belas."

Menyambung semula perbahasan atas masalah (25 Mac, 2019)

2. (D.R 33/2018) Rang Undang-Undang Pentadbiran **Bacaan Kali**
Undang-Undang Islam (Wilayah-Wilayah **Yang Kedua**
Persekutuan) (Pindaan) 2018

[Perdana Menteri]

3. (D.R 35/2018) Rang Undang-Undang Undang-Undang "
Sivil (Pindaan) 2018

[Perdana Menteri]

4. PR-1421-U(27)029

Tuan Mohd Shahr bin Abdullah [Paya Besar] akan mencadangkan :-

"Bahawa Dewan Rakyat menggesa penjelasan apakah strategi Kerajaan dalam rundingan dengan Singapura berhubung kait isu persempadanan dan kedaulatan ruang udara kedua-dua negara yang timbul sejak kebelakangan ini. Senario diplomatik Malaysia dan Singapura telah banyak berubah apabila isu-isu persempadanan ruang udara timbul secara spesifiknya melibatkan pemakaian Sistem Pendaratan Instrumen (ILS) di Lapangan Terbang Seletar dan kewujudan Kawasan Larangan Kekal (PRA) untuk aktiviti ketenteraan di ruang udara Pasir Gudang. Kerajaan perlu melihat situasi ini secara serius apabila Singapura membantah kewujudan PRA di ruang udara Pasir Gudang kerana pada anggapan mereka ia akan mengekang aktiviti penerbangan awam walaupun begitu jelas PRA itu hanya ditujukan kepada aktiviti ketenteraan sahaja. Cabaran juga timbul dan perlu diselesaikan oleh Kerajaan apabila Malaysia membuat bantahan terhadap penggunaan ILS yang memerlukan pesawat mengguna ruang udara Pasir Gudang yang akan

mengundang kekangan pembangunan fizikal bandar itu terutamanya membabit isu had ketinggian bangunan dalam laluan ILS. Rundingan antara kedua negara ini amat penting dalam mempertahankan kedaulatan persempadanan negara dan seharusnya Malaysia bertegas dan berhati-hati supaya akhirnya kedua-dua negara mendapat penyelesaian yang terbaik dalam hal ini."

[Menteri Pengangkutan]

5. PR-1421-U(27)030

Tuan Mohd Shahar bin Abdullah [Paya Besar] akan mencadangkan :-

"Bahawa Dewan Rakyat menggesa Kerajaan menjelaskan kegelisahan anak muda mengenai perancangan dan dasar yang menyeluruh melibatkan pembangunan golongan belia meliputi semua golongan masyarakat dan kaum di negara ini. Kerajaan perlu mempunyai perancangan dasar yang jelas seperti yang dilaksanakan Kerajaan terdahulu melalui Transformasi Nasional 2050 yang menggariskan enam teras tumpuan pembangunan belia masa hadapan yang dinamik dan berwawasan. Anak muda kini dibelenggu kerisauan berkenaan dasar pembangunan belia dan dasar pembangunan sukan yang tidak jelas sehingga memberi kesan terhadap kemajuan serta penambahbaikan organisasi belia dan sukan secara keseluruhan. "

[Menteri Belia Dan Sukan]

6. PR-1421-U(27)031

Tuan Mohd Shahar bin Abdullah [Paya Besar] akan mencadangkan :-

"Bahawa Dewan Rakyat menggesa Kerajaan membentangkan dasar dan pelan yang menyeluruh berkenaan halatuju negara jangka masa panjang selepas tamatnya Wawasan 2020. Kerajaan perlu memberi penjelasan kepada kebimbangan rakyat serta membuka ruang perbincangan disamping mendapatkan input daripada rakyat berkenaan apakah rancangan Kerajaan merangkumi seluruh lapisan masyarakat pelbagai umur menyentuh kesinambungan ekonomi dan kesejahteraan rakyat jangka masa panjang. Kegusaran rakyat kini adalah apa yang akan berlaku pada 30 tahun akan datang. Rakyat gusar mengenai cabaran taraf hidup yang semakin kompleks di samping keadaan sosioekonomi dan keselamatan yang tidak menentu menyebabkan kegagalan kesinambungan kemajuan dan kesejahteraan akan terbantut. "

[Perdana Menteri]

7. PR-1421-U(27)032

Tuan Mohd Shahar bin Abdullah [Paya Besar] akan mencadangkan :-

"Bahawa Dewan Rakyat menggesa Kerajaan membentangkan perincian laporan penggunaan kewangan, perkembangan laporan pembangunan dan prestasi terkini Jawatankuasa Pemerikasaan Pendidikan Teknikal dan Latihan Vokasional (JKPTVET). Fungsi dan peranan penubuhan

jawatankuasa ini semenjak diperkenalkan pada 21 Jun 2018 dilihat belum memberikan gambaran jelas berkenaan pelan perkembangan dan strategi pencapaian yang amat penting untuk diketahui oleh rakyat khususnya anak muda pemegang taruh meliputi pelajar, komuniti, industri dan penyedia TVET awam dan swasta yang terlibat secara langsung dalam bidang kemahiran. Kerajaan secara serius perlu memberikan perhatian terhadap perkara ini kerana ia melibatkan pendidikan dan masa hadapan anak muda yang inginkan jaminan Kerajaan memastikan mereka berjaya dalam bidang kemahiran. "

[Menteri Pendidikan]

8. PR-1421-U(27)033

Tuan Mohd Shahr bin Abdullah [Paya Besar] akan mencadangkan :-

"Bahawa Dewan Rakyat menggesa Kerajaan memberi perhatian terhadap kebimbangan keadaan tidak selamat melibatkan banduan dalam penjara di seluruh negara merangkumi isu kepadatan sel, masalah kemudahan dalam penjara, tahap kawalan kesihatan dan keselamatan penjara serta penyebaran wabak penyakit. Kebanjiran jumlah banduan di dalam sesetengah penjara di negara ini menyebabkan keadaan yang tidak kondusif berlaku seterusnya mengakibatkan risiko penyebaran wabak penyakit yang lebih tinggi seperti penyakit TB dan kencing tikus. Sebuah kajian menyeluruh dan komprehensif harus dibentang dan dibincangkan segera bagi mendapatkan penyelesaian memandangkan situasi ini akan memberikan kesan terhadap persekitaran sekeliling dan ia akan menjejaskan kesejahteraan masyarakat secara keseluruhan."

[Menteri Dalam Negeri]

9. PR-1421-U(27)034

Tuan Mohd Shahr bin Abdullah [Paya Besar] akan mencadangkan :-

"Bahawa Dewan Rakyat menggesa Kerajaan memberi penjelasan terhadap kerisauan rakyat berhubung usaha mendukung Perlembagaan Negara dengan memperkasa identiti kenegaraan dan perpaduan melalui Jabatan Perpaduan Negara dan Integrasi Nasional (JPNIN) yang dilihat semakin lesu dan tidak aktif. Kerajaan perlu membentangkan serta memberi ruang perbincangan dengan segera apakah perancangan terperinci dan strategi jangka masa panjang JPNIN untuk mengukuhkan perpaduan dan menyemai semangat Rukun Negara dalam diri setiap warganegara disamping membentangkan laporan kewangan dan prestasi JPNIN bagi suku ketiga dan keempat tahun 2018. Kerisauan yang timbul adalah Kerajaan baharu ini dilihat tidak memperkasa fungsi dan peranan JPNIN yang mempunyai struktur jawatankuasa yang efisien dan tersusun malah Kerajaan dilihat hilang fokus terhadap strategi menyediakan perancangan khusus bagi perpaduan dan integrasi nasional secara keseluruhan."

[Perdana Menteri]

10. PR-1421-U(27)035

Tuan Mohd Shahr bin Abdullah [Paya Besar] akan mencadangkan :-

"Bahawa Dewan Rakyat menggesa Kerajaan memberi penjelasan terhadap kebimbangan rakyat berhubung dasar Kerajaan dalam sektor automotif negara yang tidak seimbang dan memberikan lebih banyak keuntungan buat syarikat pengeluar kenderaan luar negara untuk menguasai pasaran berbanding syarikat pengeluar kenderaan tempatan. Kerajaan perlu menjelaskan mekanisme dan strategi yang menyeluruh dalam memastikan syarikat-syarikat automotif tempatan seperti Syarikat Proton dan Perodua terus kompeten agar dilihat lebih berdaya saing dengan syarikat luar negara. Kerajaan juga harus menetapkan kewajipan buat seluruh institusi pentadbiran dan agensi Kerajaan seluruh negara menggunakan kenderaan berjenama tempatan sebagai kenderaan rasmi supaya ia dapat dilihat sebagai usaha menyokong semangat kenegaraan dan membantu merencanakan perkembangan produk kereta nasional."

[Menteri Perdagangan Antarabangsa Dan Industri]

11. PR-1421-U(27)039

Datuk Seri Ir. Dr. Wee Ka Siong [Ayer Hitam] akan mencadangkan :-

"Agar institusi Parlimen menetapkan supaya satu **Jawatankuasa Pemilih Khas** ditubuhkan dan satu **referendum rakyat** diadakan bagi meneliti semua pandangan rakyat Malaysia mengenai langkah Kerajaan untuk memansuhkan hukuman mati dalam 32 kesalahan melibatkan lapan perundangan negara. Dalam semangat Malaysia Baru selepas 9 Mei, ianya menjadi satu tanggungjawab Kerajaan agar dapat menghormati pandangan setiap lapisan rakyat Malaysia terutamanya mengenai perkara memansuhkan hukuman mati yang juga melibatkan nyawa masyarakat termasuk keluarga mangsa atau keluarga tahanan hukuman mati.

"Sekiranya pandangan rakyat ini tidak diteliti, Kerajaan Pakatan Harapan akan dilihat sebagai menafikan hak kebebasan bersuara mereka. Kerajaan juga perlu menyatakan pendirian dengan jelas, apakah alternatif lain yang akan diganti selepas pemansuhan hukuman mati ini dilaksanakan dan apakah ia mampu dijadikan sebagai langkah pencegahan atau sebaliknya. Kerajaan Pakatan Harapan perlu sedar bahawa kejayaan mereka menjadi Kerajaan hari ini adalah disebabkan kuasa dan suara rakyat. "

[Perdana Menteri]

12. PR-1421-U(27)040

Datuk Seri Ir. Dr. Wee Ka Siong [Ayer Hitam] akan mencadangkan :-

"Agar projek Landasan Keretapi Pantai Timur (ECRL) tidak dibatalkan memandangkan ia sudah siap 20% dan Kerajaan perlu membayar pampasan yang tinggi kerana melanggar kontrak perjanjian. Tambahan pula, landasan yang akan memendekkan jarak perjalanan dari Kuala Lumpur ke Kota Bharu ini berupaya memberi manfaat ekonomi kepada negara dengan melonjakkan Keluaran Dalam Negara Kasar (KDNK) atau *Gross Domestic Product (GDP)* di tiga negeri pantai timur sebanyak 1.5%. Ia juga akan merangsang pertumbuhan ekonomi di pantai timur, rangkaian hubungan yang penting di antara timur dan barat serta merapatkan jurang ekonomi antara bandar-luar bandar. Maka Dewan Rakyat menyeru agar YAB Perdana Menteri dan semua ahli Jemaah Menteri dapat meneruskan projek ECRL ini."

[Perdana Menteri]

13. PR-1421-U(27)041

Datuk Seri Ir. Dr. Wee Ka Siong [Ayer Hitam] akan mencadangkan :-

"Bahawa Dewan Rakyat ini menggesa Kerajaan supaya memaparkan Laporan Akhir Majlis Penasihat Kerajaan atau *Council of Eminent Persons (CEP)* dengan mengeluarkan unsur-unsur berkaitan kepentingan negara yang sensitif daripada Laporan CEP serta mengemukakan laporan mengenai tindakan-tindakan yang telah diambil daripada cadangan-cadangan oleh CEP. Menteri di Jabatan Perdana Menteri telah memaklumkan dewan ini pada 15 Oktober 2018 bahawa CEP telah tamat melaksanakan tugas pada 19 Ogos 2018 dan pihak Kerajaan telah pun menerima laporan cadangan penambahbaikan yang disyorkan oleh CEP. Memandangkan enam bulan telah berlalu untuk Kerajaan untuk meneliti Laporan CEP, maka atas prinsip ketelusan dan akauntabiliti, tibalah masa bagi Kerajaan untuk mendedahkan Laporan CEP supaya rakyat Malaysia dapat memberikan input serta sama-sama menentukan hala tuju negara."

[Perdana Menteri]

14. PR-1421-U(27)042

Datuk Seri Ir. Dr. Wee Ka Siong [Ayer Hitam] akan mencadangkan :-

"Bahawa Dewan Rakyat ini menggesa Kerajaan supaya memaparkan laporan Jawatankuasa Pembaharuan Institusi (*Institutional Reforms Committee-IRC*) serta laporan mengenai tindakan-tindakan yang telah diambil daripada cadangan-cadangan pembaharuan oleh IRC. Memandangkan wujudnya dakwaan oleh seorang Hakim Mahkamah Rayuan melalui affidavit yang boleh menjejaskan keyakinan orang awam terhadap institusi kehakiman baru-baru ini, maka adalah penting bagi rakyat Malaysia untuk mengetahui usaha-usaha penambahbaikan serta pembaharuan yang substantif dalam pentadbiran institusi-institusi seperti badan kehakiman dalam negara. "

[Perdana Menteri]

15. PR-1421-U(27)043

Datuk Seri Ir. Dr. Wee Ka Siong [Ayer Hitam] akan mencadangkan :-

"Dewan ini menyeru agar Kerajaan dapat mendengar suara rakyat dan seterusnya membatalkan cadangan projek kereta nasional ketiga yang dijadualkan pelaksanaannya pada tahun 2020. Menteri Kewangan telah memberi jaminan pada Ogos 2018 bahawa projek kereta nasional ketiga tidak akan menggunakan wang rakyat. Namun, Menteri Pembangunan Usahawan telah mengumumkan peruntukan dana sebanyak RM20 juta pada Januari 2019 bagi membangunkan prototaip kereta nasional ketiga. Kos untuk penyelidikan dan pembangunan (R&D) dan juga penghasilan kereta nasional ketiga melibatkan pelaburan berbilion-bilion ringgit. Walaupun projek ini dimajukan oleh syarikat berkaitan Kerajaan (GLC) seperti SilTerra Malaysia Sdn Bhd dan Sime Darby seperti yang diwar-warkan, ianya secara tidak langsung melibatkan wang rakyat yang dicarum melalui pelaburan Khazanah Nasional, Permodalan Nasional Berhad (PNB), Kumpulan Wang Simpanan Pekerja (KWSP) dan Kumpulan Wang Amanah Pencen (KWAP). Memandangkan situasi ekonomi negara yang tidak menentu, projek kereta nasional ketiga akan membebankan Kerajaan dan rakyat (khususnya pembeli kereta) sekiranya projek ini diteruskan. Adalah disarankan agar projek kereta nasional ketiga dibatalkan demi menjimatkan wang rakyat."

[Perdana Menteri]

16. PR-1421-U(27)044

Datuk Seri Ir. Dr. Wee Ka Siong [Ayer Hitam] akan mencadangkan :-

"Menurut laporan media Sin Chew Daily bertarikh 19 Ogos 2018, Ketua Strategi PPBM Rais Hussin yang merupakan Pengerusi Jawatankuasa Penggubalan Manifesto Pakatan Harapan sebelum PRU14 telah mengumumkan bahawa semasa Buku Harapan (Manifesto PH untuk PRU14) dirangka, pra-syarat untuk menilai pengiktirafan UEC adalah kelulusan dalam 4 mata pelajaran iaitu Bahasa Melayu, Sejarah, Matematik dan Sains di peringkat SPM. Akan tetapi, Kementerian Pendidikan setakat ini tidak pernah menjelaskan perkara tersebut yang banyak menimbulkan kekeliruan dan ianya berlainan nada dengan apa yang dijanjikan oleh Pakatan Harapan semasa PRU14, iaitu UEC dapat diiktiraf hanya dengan memperolehi kepujian dalam mata pelajaran Bahasa Melayu di peringkat SPM, maka UEC boleh diiktiraf. Mantan Menteri Pelajaran iaitu ahli parlimen Pagoh telah mengarahkan semua universiti awam tempatan untuk menambah satu syarat am bagi kemasukan ke universiti awam iaitu sekurang-kurangnya lulus dalam mata pelajaran Sejarah di peringkat SPM dan mata pelajaran Sejarah telah menjadi mata pelajaran wajib lulus dalam SPM. Ini bermakna tanpa lulus mata pelajaran sejarah dalam SPM, seseorang calon itu tidak boleh memperolehi sijil SPM. Arahan tersebut berkuatkuasa semenjak tahun 2013.

menjadi mata pelajaran wajib lulus dalam SPM. Ini bermakna tanpa lulus mata pelajaran sejarah dalam SPM, seseorang calon itu tidak boleh memperolehi sijil SPM. Arahan tersebut berkuatkuasa semenjak tahun 2013. Dewan ini mendesak Kementerian Pendidikan untuk memperjelaskan sama ada mata pelajaran Sejarah, Matematik dan Sains di peringkat SPM masih diambil kira sebagai prasyarat pengiktirafan UEC seperti yang dikatakan oleh Rais Hussin. Sekiranya kenyataan Rais Hussin itu benar, maka Lembaga Peperiksaan Malaysia (LPM) perlu melakukan penyelarasan dasar baru bagi mengatasi kekangan syarat kemasukan pelajar UEC ke universiti awam tempatan, Kementerian Pendidikan mesti mempunyai pendirian yang jelas dalam perkara ini dan tidak boleh berbolak-dalik. Selaras dengan manifesto Pakatan Harapan, Kementerian Pendidikan harus memberi pengiktirafan segera ke atas pelajar Sijil Peperiksaan Bersepadu (*Unified Examination Certificate-UEC*) seperti mana yang dijanjikan oleh YB Kulai merangkap Timbalan Menteri Pendidikan semasa berkempen di PRU 14 dan dalam rakaman video beliau pada 9 April 2018 yang dimuat naik ke "Youtube", di mana beliau mengatakan Pakatan Harapan sudah mempunyai "hitam putih" untuk mengiktiraf UEC sebaik sahaja Pakatan Harapan menjadi Kerajaan. "

[Menteri Pendidikan]

17. PR-1421-U(27)045

Datuk Seri Ir. Dr. Wee Ka Siong [Ayer Hitam] akan mencadangkan :-

"Dewan ini menyeru agar Kerajaan dapat meneruskan projek pembinaan 10 buah SJKC baru dan perpindahan 6 buah SJKC kurang murid yang telah diluluskan oleh Kerajaan pada 26 Oktober 2017, termasuk mengekalkan 10 nama sekolah baru yang telah diluluskan.

Kerajaan sepatutnya menyiapkan projek tersebut dalam masa 5 tahun dengan peruntukan RM20 juta setiap tahun (jumlah keseluruhannya RM100 juta) seperti yang telah dijanjikan oleh Kerajaan terdahulu.

Tetapi malangnya, pelaksanaan projek tersebut agak lambat dan tiada perkembangan yang signifikan. Dengan itu, mengharapkan Dewan ini mengambil maklum perkara ini dan mendesak Kerajaan Pakatan Harapan mempercepatkan proses pembinaan 10 buah SJKC baru dan perpindahan 6 buah SJKC kurang murid ke kawasan yang lebih padat penduduk cina. "

[Menteri Pendidikan]

18. PR-1421-U(27)046

Datuk Seri Ir. Dr. Wee Ka Siong [Ayer Hitam] akan mencadangkan :-

"Dewan ini menggesa Kerajaan supaya dapat memberikan peruntukan yang sama rata kepada Ahli Parlimen tanpa mengira fahaman politik. Ini kerana, Ahli Parlimen Kerajaan di Semenanjung Malaysia telah diberi peruntukan

sebanyak RM1,000,000 iaitu RM300,000 untuk operasi Pusat Khidmat dan RM700,000 bagi peruntukan kawasan pada tahun 2018. Manakala tahun 2019, Ahli Parlimen Kerajaan diperuntukkan RM1,800,000 iaitu RM300,000 untuk operasi Pusat Khidmat dan RM1.5 juta bagi peruntukan kawasan. Sementara Ahli Parlimen pembangkang hanya diberikan RM100,000 sahaja bagi tahun 2018 dan tidak menerima apa-apa peruntukan untuk tahun 2019. Ini merupakan satu bentuk diskriminasi yang amat ketara.

Gesaan ini selari dengan semangat 'Malaysia Baru' dan hasrat badan bebas (NGO) seperti BERSIH yang mahu memastikan tiada istilah diskriminasi dalam negara dan semua pengundi harus dilayan dengan adil dan saksama. Malah, perkara ini juga diperjuangkan oleh pemimpin Kerajaan hari ini ketika bergelar pembangkang suatu ketika dahulu. Dalam masa sama, semangat 'Malaysia Baru' ini juga yang menuntut kesuburan demokrasi. Prinsip keadilan ini akan dijadikan sebagai penanda aras dan seterusnya diteladani oleh Kerajaan negeri yang lain di Malaysia tanpa mengira parti mana yang memerintah. "

[Perdana Menteri]

19. PR-1421-U(27)027

Tuan Fong Kui Lun [Bukit Bintang] akan mencadangkan :-

"supaya mempergiatkan usaha untuk menyatupadukan rakyat berbilang kaum di Malaysia yang kelihatan masih lemah dan longgar meskipun negara telah menjadi negara merdeka dan berdaulat sejak 61 tahun lalu supaya mereka boleh hidup dengan aman dan saling memerlukan dan memahami bagi memudahkan mereka membangunkan ekonomi negara secara bersama dan merealisasikan impian Negaraku Malaysia Baharu selepas PRU 14."

[Perdana Menteri]

20. PR-1421-U(27)028

Tuan Fong Kui Lun [Bukit Bintang] akan mencadangkan :-

"memulihkan pilihan raya Kerajaan Tempatan seluruh negara supaya urustadbir Kerajaan menjadi lebih cekap, akauntabiliti dan bersih dengan mengambil langkah pertama untuk membuat kajian serius dan melakukan pungutan suara antara rakyat."

[Menteri Perumahan Dan Kerajaan Tempatan]

21. PR-1421-U(27)036

Dato' Johari bin Abdul [Sungai Petani] akan mencadangkan :-

"Banyak kuarters-kuarters guru yang dibina di seluruh negara dengan bagitu cantik dengan harga beratus juta ringgit ditinggalkan kosong tidak didiami. Kuarters ini telah banyak yang rosak dan tidak terjaga. Kawasan dipenuhi semak samun dan tidak terurus. Banyak yang menjadi tempat penagih dadah beroperasi dan kawasan ini menjadi bukti bagaimana Kerajaan tidak prihatin terhadap alam sekitar dan pembaziran wang rakyat yang amat luar biasa. Dicadangkan semua kuarters ini dijual kepada mana-mana pihak dengan harga yang berpatutan supaya beban tidak lagi ditanggung oleh Kerajaan dan pulangan dari jualan ini boleh digunakan bagi mereka yang memerlukan."

[Menteri Pendidikan]

22. PR-1421-U(27)037

Dato' Johari bin Abdul [Sungai Petani] akan mencadangkan :-

"Dadah telah mula masuk ke sekolah-sekolah. Walau pun jumlahnya masih kecil tetapi tindakan segera mesti diambil. Bagi mengelak dari pelajar terlibat sekolah disarankan memperbanyakkan kegiatan pasukan beruniform seperti kadet tentera, kadet polis, kedet bomba, pengakap dan lain-lain pasukan beruniform dan perbanyakkan aktiviti luar sekolah. Kegiatan ini semua akan membina perasaan kekitaan dan saling tegur menegur. Jabatan kaunseling di sekolah juga mesti diperkemaskan agar pelajar yang menghadapi masalah cepat dikenal pasti dan diambil tindakan."

[Menteri Pendidikan]

23. PR-1421-U(27)038

Dato' Johari bin Abdul [Sungai Petani] akan mencadangkan :-

"Kemalangan jalan raya makin meningkat di negara ini. Di antara punca kemalangan ialah pengguna yang cuai dan penguatkuasaan oleh agensi yang lemah. Sebagai contoh kemalangan melanggar kenderaan yang diberhenti di bahu jalan, atau kenderaan yang rosak ditinggalkan tanpa dipaparkan notis kereta/kenderaan rosak. Kerajaan hendaklah menggunakan semua ruang seperti TV dan radio bagi menyebarkan maklumat kepada pengguna jalan raya jika kenderaan mereka rosak, notis secukupnya mesti dipamerkan agar pengguna yang lain sedar dan tahu masalah wujud di hadapan mereka dan mereka akan bersedia untuk elakkan dari melanggar kenderaan yang rosak ini."

[Menteri Pengangkutan]

****UCAPAN-UCAPAN
(PERATURAN MESYUARAT 17)
(KAMAR KHAS)**

Tarikh Ucapan	Ahli Yang Berucap	Tajuk Ucapan	Menteri Yang Bertanggungjawab
1. 26.03.2019 (Selasa)	1. YB Tuan Cha Kee Chin (Rasah)	1. Masalah Tiada Liputan Talian Telefon	1. YB Menteri Komunikasi Dan Multimedia
2. 26.03.2019 (Selasa)	2. YB Puan Maria Chin binti Abdullah (Petaling Jaya)	2. Isu Pengurusan Bangunan Strata Di Kawasan Parlimen Petaling Jaya	2. YB Menteri Perumahan Dan Kerajaan Tempatan

**** Ucapan Di Bawah Usul Berkenaan Perkara Tadbir Kerajaan (Peraturan Mesyuarat 17)**